

Ba Xefe Estado Maior F-FDTL, Brigadeiru Jeneral Falur Rate Laek, membru-sira husi governu Timor-Leste, Polisia Nasionál Timor-Leste, Forsa Defeza Timor-Leste, kolega husi forsa naval australianu, no ba mariñeirus no ofisiais Navál Estados Unidos nian. Bom dia.

Ha'u haksolok mai iha ne'e ho ita-boot-sira hotu hodi marka konkluziun ho susesu ba ezersisiu CARAT tinan rihun rua sanulu resin ualu (2018). Ohin maka fim ba ezersisiu CARAT dalima (5th) dezde Forsa Navál Estados Unidos no F-FDTL hahu serbisu hamutuk iha tinan rihun rua sanulu resin tolu (2013).

Ha'u hakarak agradese Ministériu Defeza; Komponentes Navál no Terestre F-FDTL nian; Unidade Polisia Marítima PNTL, no membru-sira husi *the U.S. Navy's Commander Task Force 75*. Ha'u agradese ba ita-boot sira-nia planeamentu ne'ebé di'ak tebes, servisu makaas, no dedikasaun hodi halo ezersisiu tinan ne'e lao ho susesu.

Mós, agradesimentu espesial ba lideransa-sira Amerikanu no Timoroan iha ekipa CARAT 18 (sanulu resin ualu): Tenente Zacarias Vidigal no Tenente Manuel Soares husi F-FDTL no Kapitaun Tenente Paul Duenas husi Navál Estados Unidos.

Ita-nia ezersisius CARAT fortalese seguransa marítima. Sira fortalese interoperabilidade entre militar Estados Unidos no nasaun parseiru sira. Ne'e importante tebes atu nune'e ita serbisu hamutuk hodi asegura ambiente seguransa marítima ida ne'ebé livre, nakloke no nakonu ho dame iha rejiaun Indo-Pasífiku.

Objetivu husi CARAT tinan ne'e kumpri tarefa tolu: hadi'a no manutensaun ba ró kiik, halibur evidénsia, no prosedimentu sira atendimentu médiku kombate iha ró leten.

Tinan ne'e maka ba dahuluk liu ami fornese treinamentu ba F-FDTL no PNTL kona-ba prosedimentu médiku emerjénsia iha ró leten ka "iha tasi".

Intensaun seluk mós maka atu hadi'a ita-nia interoperabilidade no atu ajuda Timor-Leste nia misaun hodi fortalese aplikasaun leis iha Timor nia tasi sira.

Importante liu tan, ezersisiu ne'e ajuda ona hodi hametin lasus amizade entre Estados Unidos no Timor-Leste.

Ita hotu-hotu orgullu ho ita-nia ezersisiu bilateral no multilateral sira. Aleinde mós, Estados Unidos komprometidu atu ajuda profesionaliza Forsa Defeza Timor-Leste iha área-sira seluk.

Ami ajuda profesionaliza liuhusi ami-nia Programa Formasaun iha lian Ingles. Ami fornese instrutor lian Ingles mai husi militar Estadus Unidus nia Institutu Lingua. Ami haruka ofisiais no sarjentu Timoroan sira ba Estadus Unidus liuhusi ami-nia programa Internasionál ba Edukasaun no Formasaun Militar ka IMET.

Por ezemplu: Graduadu IMET nian ida maka Sarjentu Teixeira, dadaun ne'e ajuda ami-nia instrutor lian Ingles, Señor Robert Mitchell ne'ebé kolokadu ba hanorin iha Baze Naval Hera.

Sarjentu Martinho Teixeira agora dadaun ne'e ajuda mellora qualidade Instrusaun ba Timor-Leste.

Maibé ita mós hein katak esperiênsia ne'e sei ajuda nia hodi sai instrutor lian Ingles ida ne'ebé kapasitadu liutan.

No ita hein katak nia sei forma tan soldadus, mariñeirus, no lideransa F-FDTL atus ba atus iha tinan hirak tuir mai.

Graduadu seluk tan ne'ebé ami sente orgullu tebes mak Komandante Flotila Komponente Naval F-FDTL nian, Tenente Loe Borges. Iha tinan rihun rua sanulu resin hitu (2017) Loe sai primeiru ofisial F-FDTL ne'ebé graduadu husi *Naval Staff College*. Nia mós halo nia kursu mestradu iha universidade lokál ida durante nia tempu iha *Naval Staff College*.

Inísiu fulan ne'e, Kapitaun Victor Marcal sai ofisial ba dahuluk husi Timor-Leste ba estuda iha Estadus Unidus nia Eskola Estadu Maior Jenerál.

Ami hein katak ami-nia esforsu-sira ajuda ita-boot-sira desenvolve ita-boot sira-nia kapasidades no ajuda ita-boot sira-nia misaun aplikasaun leis iha Timor nia tasi soberanu sira.

No ami hein katak esforsu-sira ne'e bele ajuda hapára atividade-sira hanesan peska ilegal ne'ebé estraga imi-nia área protejida sira no naok rikusoin povu Timor nian.

Dala ida tan, ha'u hakarak fó obrigada ba Brigadeiru Jenerál Falur; ofisiais, mariñeirus, no soldadu F-FDTL sira, PNTL; no ikus liu ba ami-nia mariñeirus no ofisiais Naval Estadus Unidus nian.

Imi-nia servisu makaas no sakrifisiu ajuda ona ita, lá'os deit hasae kapasidades, maibé mós fortalese lasus amizade entre ita-nia nasaun rua.

Boa viajen no ami hein iha tinan oin hasoru malu fali ho ita-boot sira! Hamutuk ita susesu!